



Preporuka za iskorištavanje vremena u mjesecu milosti (Medina)

Hatib: dr. Ali ibn Abdurrahaman el-Huzejfi

9. ramazan 1444. po Hidžri / 31. mart 2023.

Hvala Allahu, Gospodaru Zemlje i nebesa, Objavitelju jasnih ajeta, Plemenitom, Koji obasipa Svojim dobrima i blagoslovom, Onome Koji uzdiže i čisti duše ibadetima, i zabranom harama. Hvalim svog Gospodara i zahvaljujem Mu na nepresušnim blagodatima, onima koje znamo i koje ne znamo. Niko, osim Njega, u Čijim su rukama dobra djela i zaštita od zla i propasti, ne poznaje sve blagodati. Svjedočim da nema boga osim Allaha, jedinog, Koji nema druga, Vladara, Vlasnika, Silnog, i svjedočim da je naš vjerovjesnik i prvak Muhammed, sallallahu alejhi ve sellem, Njegov rob i poslanik, pomognut, od Allaha, džellešanuhu, mudžizama – nadnaravnim djelima. Allahu moj, smiluj se, spasi i blagoslovi Svoga roba i poslanika Muhammeda, sallallahu alejhi ve sellem, i njegovu porodicu i ashabe, koji su pretekli druge u dobrim djelima. Bojte se Allaha, svoga Gospodara, Koji vas obasipa blagodatima, i čuva koga hoće, od kazne i zla, bogobojažnost je najbolja opskrba za Dan povratka.

O muslimani, znajte da su najvredniji oni sati, dani i mjeseci koje je Allah odlikovao, a najvrednija djela ona koja je Allah propisao da se čine u tim satima, danima i mjesecima. Allah, džellešanuhu, naučio nas je koji su to sati, dani i mjeseci, propisao nam je da u njima činimo dobra djela, i upozorio nas je da ne činimo grijeha u njima i u drugim vremenima, kako bismo se što više posvetili dobrim djelima, i kako bismo stranice svojih djela sačuvali od harama i upropaštavajućih grijeha. Našem Gospodaru pripada svaka hvala i zahvalnost na tome što nas je naučio svemu što je korisno za nas, i upozorio na ono što je štetno i pogubno za nas.





Uzvišeni kaže: "Mi smo vam jednog od vas kao Poslanika poslali, da vam riječi Naše kazuje i da vas očisti i da vas Knjizi i mudrosti pouči i da vas ono što niste znali nauči." (El-Bekara, 151)

"A kada budete sigurni, spominjite Allaha onako kako vas je On naučio onome što niste znali." (El-Bekara, 239)

"Tebi Allah objavljuje Knjigu i mudrost i uči te onome što nisi znao; velika je Allahova blagodat prema tebi!" (En-Nisa, 113)

"... i poučavate se onome što ni vi ni preci vaši niste znali?" (El-En'am, 91)

Prema tome, dobro počinje i završava kod Allaha, kao što kaže Uzvišeni: "... i da će se Gospodaru tvome ponovo vratiti." (En-Nedžm, 42). Hvala Allahu na blagodatima.

Ako se oni koji ne vjeruju u Allaha i u Sudnji dan, danas raduju blještavilu i prolaznim ukrasima i užicima dunjaluka, kao što nam je to objasnio Allah, džellešanuhu, u Svojoj Knjizi: "Kome hoće, Allah daje u obilju, i uskraćuje. Oni se raduju životu na ovome svijetu, a život na ovom svijetu prema onome svijetu samo je prolazno uživanje" (Er-Ra'd, 26), i kao što je rekao za nevjernike: "To vam je zato što ste bez ikakva osnova na Zemlji bahati bili i što ste likovali. Ulazite kroz kapije Džehennema, u njemu ćete vječno ostati – a ružno je prebivalište oholih!" (Gafir, 75–76); "Uistinu, vi ovaj prolazni svijet volite, a o onom drugom brigu ne vodite" (El-Kijama, 20–21). Ako se oni koji daju prednost dunjaluku nad ahiretom raduju onome što im je dato od dunjaluka, a zaboravljaju ahiret, neka se onda sjete Ada, Semuda, i prijašnjih naroda koji su se oglušili o ono što su im govorili njihovi poslanici, neka su na njih Allahov mir i spas, i kako su nestali njihovi užici, a ostalo kajanje, kuknjava, odgovornost i tereti njihovih loših djela.

Uzvišeni kaže: "... a oni koji ne vjeruju – koji se naslađuju i žderu kao što stoka ždere – njihovo će prebivalište Vatra biti!" (Muhammed, 12)

"O skupe džinski i ljudski, zar vam iz redova vas samih poslanici nisu dolazili koji su vam ajete Moje kazivali i upozoravali vas da ćete ovaj vaš dan dočekati?" Oni će





reći: 'Mi to priznajemo na svoju štetu.' Njih je život na Zemlji bio obmanuo i oni će sami protiv sebe posvjedočiti da su bili nevjernici. Tako je, jer Gospodar tvoj nije uništavao sela i gradove zbog zuluma njihova - bez prethodne opomene njihovim stanovnicima." (El-En'am, 130–131)

To su neke vijesti, koje nam Allah kazuje, o prošlosti dunjaluka i onih koji su ovaj svijet uzeli za svoju "kiblu", zadovoljili se njime umjesto ahiretom i radovali se njegovim ukrasima. Uzvišeni kaže: "Onima koji ne očekuju da će pred Nas stati i koji su zadovoljni životom na ovome svijetu, koji su u njemu smireni i onima koji su prema dokazima Našim ravnodušni – prebivalište njihovo biće Džehennem, zbog onoga što su radili." (Junus, 57–58)

Allah vam je ukazao Svoju milost najodabranijim mjesecom, objedinio vam je u njemu ibadete i blagoslove, kao ni u jednom drugom mjesecu, umnogostručio u njemu nagradu za dobra djela, kao ni u jednom drugom mjesecu, i sačuvao je muslimane u njemu od onoga što ih odvraća od pokornosti, i spriječio je šejtane da odvraćaju Muhammedov ummet s puteva dobra, kao što kaže Vjerovjesnik, sallallahu alejhi ve sellem: "Kada nastupi ramazan, otvore se kapije Dženneta, a zatvore kapije Džehennema, i u okove povežu šejtani." (Buhari i Muslim)

U ovom blagoslovljenom mjesecu natkriljuje nas plemenitost, svjetlost i blagoslov namaza.

On je i mjesec zekata za one koji žele da ga izvrše u ramazanu i koji vole dobročinstvo, pa blago onome ko ga izvrši i sredstva od zekata preda u ruke njegovih pravih vlasnika, a teško onome ko ga pomiješa sa svojim imetkom, jer će tako uništiti njegov berićet, i navući na sebe kaznu u kaburu, u obliku zmije koja će ga uzeti za čeljusti i ubrizgati u njega svoj otrov.

U ovom mjesecu treba izvršiti i druge imovinske obaveze i dobrovoljno udijeliti dio svog imetka, kako bi se zaštitio od Vatre i kako bi na Sudnjem danu uživao u hladu svoje sadake.





Također, ovo je mjesec raznih oblika zikra, spominjanja Allaha, učenja Kur'ana, kojim Allah podiže deredže, briše grijeha i održava srca u najljepšem stanju.

U njemu je mali hadž – umra, čija je nagrada kao nagrada hadža obavljenog sa Vjerovjesnikom, sallallahu alejhi ve sellem, ili hadža općenito, različiti oblici dobročinstva prema potrebnima, roditeljima i bližnjima. U hadisu se kaže: "Sadaka čuva čovjeka od ružne smrti, i otklanja nedaće."

Post podrazumijeva i pozivanje na činjenje dobra i odvrćanje od zla, i u njemu je, za one koji istinski razmišljaju o njemu, svako dobročinstvo i ostavljanje svakog grijeha. Ljudsku dušu nemoguće je popraviti i odgojiti bez posta i namaza. Uzvišeni kaže: "... a vi se potrudite da druge, čineći dobra djela, pretećete! Ma gdje bili, Allah će vas sve sabrati - Allah, zaista, sve može." (El-Bekara, 148)

Bojte se Allaha, svoga Gospodara, On će vam uvećati nagradu i zaštitit će vas od kaburskog azaba. Spasio se onaj ko se boji Allaha, a propao je onaj ko slijedi svoje strasti. Uzvišeni kaže: "... zato se natječite ko će više dobra učiniti; Allahu ćete se svi vratiti, pa će vas On o onome u čemu ste se razilazili obavijestiti." (El-Maida, 48)

O ljudi, ono što je prošlo je daleko, makar to bio jučerašnji dan, a ono što tek treba doći je blizu. Tvoji prošli dani neće se vratiti, a novi dani brzo će doći.

Uzvišeni kaže: "Ti ćeš, o čovječe, koji se mnogo trudiš, trud svoj pred Gospodarom svojim naći." (El-Inšikak, 6)

"Mi vas na skorbu patnju upozoravamo, na Dan u kome će čovjek djela ruku svojih vidjeti, a nevjernik uzviknuti: 'Da sam, bogdao, zemlja ostao!'" (En-Nebe, 40)

Ako je stvar ovakva kao što Allah spominje, onda čini dobra djela za svoj vječni život "da čovjek ne bi uzviknuo: 'Teško meni, koliko sam samo dužnosti prema Allahu propustio, čak sam se i izrugivao!' – ili da ne bi rekao: 'Da me je Allah Pravim putem uputio, sigurno bih se Njegove kazne sačuvao', ili da ne bi rekao kad doživi patnju: 'Da mi se samo vratiti – dobra djela bih činio!'" (Ez-Zumer, 56–58).

Činite što više dobrih djela u ovim danima, jer se oni više nikada neće vratiti. Ibn Abbas, radijallahu anhum, prenosi da je Vjerovjesnik, sallallahu alejhi ve sellem,





rekao: "Većina ljudi nemarna je prema dvjema blagodatima: zdravlju i slobodnom vremenu." (Buhari)

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Poslanik, sallallahu alejhi ve sellem, kaže: "Ko na mene donese jedan salavat, Allah će na njega, zbog tog salavata, donijeti deset salavata."

Molim Allaha da i meni i vama podari blagoslov u časnom Kur'anu, i da podari da nam koriste njegovi ajeti i mudra opomena. Rekoh ovo i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

